

ի դիւրս մարգագետինս և ի խաղս, որ եղեր
ընդունող մաքուր մարմնոյ նորա:

Աւրհնեալ ես ի բնաւս ա. և ի բաժինս,
զի էջ առ քեզ անէջն և անեղն, լուսաւորեաց
և աւրհնեաց և սրբեաց զքեզ:

Աւրհնեալ ես դու ի հոգս և ի հողէղէնս,
զի խառնեցաւ ընդ քեզ երրորդութեանն տա-
ղաւարդ՝ և անմեղ մարմինդ ոսկիացեալդ ի
քուրացս՝ ի քեզ ծածկեցաւ:

Դու ես երանելի՝ զի շաղախեցար արեամբ
երեսուն և ութիցն, և ներկեցար վարդագոյն՝
ներկողտ որդան. ծիրանեցար, ծարիրեցար,
պարարեցար, պարարտացար, և պարգաւա-
ճեալ պսակեցար: Երանի է քեզ և բնակչաց
քոց՝ որ եղեր դամբան կուսից և յարկ յա-
ւիտեան անուանել զանուն նոցա ի քեզ. ի
քեզ հրաշագործեաց Աստուած՝ որպէս ի Տայ-
ան դաշտին:

Երանի հողոյն ուր հողացաւ մարմինն, և
երանի աւդոյն յոր միացաւ շունչն, և թէ-
պէտ և մեկուսացաւ ի սգալեացս տեսանելոյ՝
սակայն իմանալի հողւոյն ընդ մեզ է անան-
ջատ, և զաւրութիւն հողւոյն անզատելի է
յոսկերաց սորա՝ որպէս ցուցաւ յԵղիսէոս
[Թղ. 19^բ]: